

## PABLO REMBICUACHIA ROMA PNDAR UPE ROMANOS

### *Pablo mahenduhasa Roma pndar Jesús reroyasar upe*

<sup>1</sup> Che Pablo, Jesucristo rembiguai, aicuachía co che ñehhe p̄eu. Tūpa che poravo apóstol che reco āgua ñehesa porop̄isirosa resendar mombehu āgua.

<sup>2</sup> Tūpa niha yip̄isuive omombehu uca co ñehesa ava oñehhe mombehusar upe icuachiap̄ri maranehi p̄ipe arac-ahe. <sup>3</sup> Ahe ñehesa Tūpa Rahir Jesucristo resendar. Ahe ava güecosa p̄ipe ité oyesu ou mborerecuar guasu David suindar sui; <sup>4</sup> ocuerayevise oesp̄iritu maranehi p̄ipe, ahese op̄iratasa p̄ipe omboyecua tupri ité Tūpa Rahir güecosa. Ahe niha yande Yar Jesucristo.

<sup>5</sup> Ahe ichui Tūpa ombou cheu oporop̄it̄iviisa apóstol che reco āgua, che cuai avei ava ndahei vahe judío upe Guahir recocuier mombehu āgua opacatu ivi rupi sese yeroya uca āgua ‘ip̄ipe sui toviroya che Rahir yuvireco’ oya. <sup>6-7</sup> Pe Roma pndar peico vahe, pe avei senoip̄ri ip̄āhuve peico Jesucristo rese peico vahe. Pe niha Tūpa rembiaisu peico. Oipota avei pe reco catup̄ri āgua oyeupe nara. Peip̄isi catu porovasasa, teco tuprisa yande Ru Tūpa suindar, yande Yar Jesucristo suindar avei.

### *Pablo oso pota Jesús reroyasar repia Roma ve*

<sup>8</sup> Che yip̄indar yande Yar Jesucristo rer p̄ipe, “Aviye ndeu” ahe Tūpa upe pe rese. Esepia, opacatu ivi rupi icuap̄ri sese pe yeroyasa. <sup>9</sup> Iyavei Tūpa oicua pe rese ari rupi che yeroquisa. Chupe ité niha mbahe ayapo opacatu che p̄iha p̄ipe, amombehu Tahir resendar ñehesa aviye vahe vichico. <sup>10</sup> Aporanduño ité semimbotar rupi pe p̄iri

che so ãgua rese chupe yepi. <sup>11</sup> Esepia, che aso pota ité Espírиту suindar mbahecuasa mondo p̃eu pe p̃itívii ãgua ‘toyemoviracua tupri catu Cristo rese yuvireco’ che yapave. <sup>12</sup> Che aipota ité yande ñepeí-peí yañepitívii catu ãgua Cristo rese yande yeroyasa yareco vahe pipe.

<sup>13</sup> Che rivireta, che aipota peicua setá rupi che so pota t̃eisa pe píri yepi. Cūrítei rumo ndaícatuíño víte ité. Che rumo aipota, “Toime que che poraviquisa sui Cristo rese oyemoviracua catu vahe yuvireco ipãhuve” ahe p̃eu, inungar opacatu ambuae ivi rupi ãgüe ahe ava ndahei vahe judío upe vichico. <sup>14</sup> Che cuaita ité niha opacatu ava upe che ñehe ãgua, tecua pipendar yuvirecoi vahe upe iyavei ndayaracua víteí vahe upe, imbahecuva vahe upe, nimbahecuai vahe upe avei no. <sup>15</sup> Sese pe Roma ve peico vahe upe avei ayemonguer̃hi voi eté co ñehesa p̃sírosa resendar mombehu ãgua.

### *Ñehesa p̃sírosa resendar p̃ratasa*

<sup>16</sup> Che nachí eté co ñehesa p̃sírosa resendar aviye vahe sui. Esepia, ahe Tūpa p̃ratasa opacatu víroyasar p̃síro ãgua, judío rane yipíndar, ipare opacatu ambuae ava-ava t̃eí avei. <sup>17</sup> Supi eté co ñehesa omboyecua Tūpa ava reco mbocatuprisa. Oyese yande yeroyasa pipeño ité ãgüe ehi yandeu. Esepia, icuachiapri aracahendar aipo ehi: “Acoi ava seco catupri vahe Tūpa rese oyeroyasa pipe sui oicoveño itera apir̃hi” ehi.

### *Opacatu ava rembiavi resendar*

<sup>18</sup> Supi eté niha yande Aposar oñemoirosa ip̃rata vahe ombou itera íva sui opacatu ava víroyasar̃hi upe, ndaseco p̃orai vahe upe avei, mbahe güembiapo ai sui ndoicua uca potai vahe co ñehesa supi eté vahe ambuae ava upe yuvireco. <sup>19</sup> Ahe oicua tupri t̃eí mbahe Tūpa suindar yuvireco. Esepia, Tūpa ité niha omboyecua chupe.

<sup>20</sup> Ĕgüe ehi eté Tūpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tūpa ité secoi iyavei ipīratasa apirēhi vahe. Sese ava angaipa viyar ndiyai, “Eñemosañ tēi rane oreu” ehi vakerā yuvireco chupe. <sup>21</sup> Esepia, yepe ahe oicua tēi Tūpa yuvireco viña, nombotei rumo Tūpa secosa rese. “Aviye ndeu” ndehi avei yuvireco chupe. Iyavei ipihañemoñeta mbahe ĕgüe ehi tēi vahe rese. Ipipe sui mbahe ndosenducua catu iri eté yuvireco. <sup>22</sup> Yepe, “Ore mbahecua vai” ehi tēi viña, ndoicuai eté rumo mbahe ipipe yuvireco. <sup>23</sup> Esepia, ahe Tūpa nomanoi vahe seco porañete vahe mboetei rāgüer sui, omboetei ava ocañi tēi vakerā rahanga yuvireco iyavei vīrai, opacatu mbahe mimba, mboi tēi avei omboetei yuvireco.

<sup>24</sup> Sese Tūpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboeteiēhisa pipe yuvireco. <sup>25</sup> Esepia, mbahe supi vahe reroya rāgüer sui temira tēi viroya catu yuvireco. Iyavei Tūpa ité mboyeroya rāgüer sui omboetei catu mbahe sembiapocuer tēi yuvireco. Yaposar ité ru timboeteisa catu yepi.

<sup>26</sup> Sese Tūpa opoi eté ichui, “Toyapoño poromochisa mbahe tēi güemimbotarai pipe yuvireco” ehi chupe. Evocoyase cuña avei cuimbahe rese güeco rāgüer sui yuvirecoi oyese ae. <sup>27</sup> Cuimbahe avei cuña rese güeco rāgüer sui yuvirecoiñ avei oyese ae iyavei oipota raiño ité evocoi güeco raisa yuvireco. Evocoi nungar aposa sui oyemomara ahe ae yuvireco.

<sup>28</sup> Iyavei, “Tūpa supi eté vahe” ndehise seroyaēhisa pipe yuvireco, Tūpa evocoyase opoi eté ichui ‘toyapoño ayase mbahe ndipotasai vahe güeco raisa pipe yuvireco’

oya chupe. <sup>29</sup> Ahe evocoiyase yuvirecoi opacatu mbahe-mbahe tēi pipe; oyemboaguasa-guasa tēi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tēi ava upe. Ahe oñemoïro ambuae ava mbahe pota raisave tēi, oporapichi, ivava serai, iporombopa serai, ipihañemoñeta ava reco momara ãgua tēi iyavei imahechiroi ai ipipe yuvireco. <sup>30</sup> Iyavei ambuae ava cupe cotive mara ehi-ehi tēi vahe, ahe Tūpa amotarēhisar yuvirecoi, viroïro avei ava, oyemboivate ai, oyecomboivate ai tēi avei oñehe pipe yepi, oseca-seca tēi mbahe naporai vahe güembiaporã, nomboyeroyai avei oyesupa yuvireco, <sup>31</sup> ndoyapisaca potai eté Tūpa suindar ñehesa rese, nomboaviyei avei oñehe, ndosaisui avei que ava, niñeroi avei ava upe, ndoiparaisuercoi eté ava yuvireco. <sup>32</sup> Oicua tēi Tūpa “oïmera evocoi nungar aposar upe cañisa” ehi vahe, oyapo viteño rumo mbahe tēi yuvireco iyavei ambuae ava oyapose mbahe tēi, ovihareteño sepiase yuvireco.

## 2

### *Tūpa omondo ava upe sembiapogüer rupi tupri ité*

<sup>1</sup> Oimese que pe pãhu pendar ‘co oyapo mbahe tēi; tocañi’ ohesave ambuae upe, ahese ahe ae oyemocañi tēi uca. Esepia, ahe inungar tupri avei. <sup>2</sup> Yaicua rumo Tūpa omocañise evocoi nungar mbahe tēi aposar recocuer, ahe evocoiyase oyapo mbahe supi tupri vahe. <sup>3</sup> Pe opase ava recocuer pesenoi, pe avei rumo ãgüe peye tupri peico. Pe avei eté evocoiyase ndapeñemi chietera Tūpa ñemoïrosa sui. <sup>4</sup> ¿Peroïro tie Tūpa oyapo vitesese mbahe aviye vahe oñemosase, seco mbegüe tupri ai vitesese avei pëu? ‘Tosecuñaro güecocuer yuvireco’ oyapave rumo ãgüe ehi pëu. <sup>5</sup> Pe rumo pepiharãta viteño ité Tūpa upe pe yevi potaēhi ãgua. Sese pereco catu viteño ité

Tūpa ñemoirosa peyese, acoi ari oyepotase Tūpa güeco tuprisa pipe yande renoipara yande mocañi água, anise yande pĩsiro água curi. <sup>6</sup> Ahese opara omboepi ñepepei-pey yande rembiapogüer rupi yandeu. <sup>7</sup> Omboura tecovesa apirēhi vahe yandeu yasecase teco ori, Tūpa suindar poromboeteisa iyavei mbahe apirēhi vahe yande mbahe tupri aposa pipe. <sup>8</sup> Ombou aveira oñemoirosa ava ndi-poromboyeroyai vahe upe, ahe acoi co ñehesa supi eté vahe reroya rāgüer sui viroya vahe mbahe tēi. <sup>9</sup> Judío opacatu mbahe-mbahe tēi aposar ranengatu oiporarara mbahe rasicuer yuvireco, iparera ndahei vahe avei judío. <sup>10</sup> Tūpa rumo opacatu seco catupri vahe upe omondora imboetei água 'toipisi teco ori iyavei toyuvirecoi mbahe tupri pipe' oya chupe. Yipindar rumo judío eta upe rane omondora, iparera ndahei vahe judío upe.

<sup>11</sup> Esepia, Tūpa ndayande mboyoaviratii yande rereco. <sup>12</sup> Ēgüe ehi eté, opacatu oyemboangaipa vahe Moisés porocuita porēhi oyemocañi tēira yuvireco. Acoi oyemboangaipa vahe Moisés porocuita rereco pipe yuvireco, ahe porocuita pipe avei opara ocañi tēi porandusave yuvireco coiyē. <sup>13</sup> Esepia, osenduño tēi vahe porocuita ndahei seco catupri vahe yuvireco. Viroya vahe ité rumo porocuita, ahe seco catupri vahe yuvirecoi. <sup>14</sup> Supi eté acoi ndahei vahe judío yuvirecoi vahe yepe ndovirecoi co porocuita yuvireco viña, ahe rumo co porocuita rupi tupri oyapose mbahe, ahe evocoiyase inungar porocuita vireco vahe yuvireco. <sup>15</sup> Esepia, güembiapo catupri pipe omboyecua porocuita virecose opiha pipe. Opihañemoñeta pipe avei oyandu porocuita mboaviyasa. Ahe ipipe avei oyandu mbahe güembiavi, ichui avei oye-monguerēhi mbahe aviye vahe apose. <sup>16</sup> Ahe ari cañi pipe Tūpa oyocuai ucara opacatu ava rembiapo cuaēhisa repri pisi água Jesucristo upe, co ñehesa pĩsirosa resendar

amombehu vahecuer rupi tupri ěgüe ehira curi.

*Ñehesa judío resendar, Moisés porocuita resendar avei*

<sup>17</sup> Pe rumo, “Judío aico” peye vahe, peyeroya opacatu Moisés porocuita mboaviyesa pipe pe reco catupri āgua Tūpa rovaque viña. Iyavei ipipe peyecomboivate ai Tūpa rese peicose. <sup>18</sup> Peicua semimbotar. Ahe porocuita pe mbohe avei mbahe aviye catu vahe poravo āgua. <sup>19</sup> Pe, “Aicatu ité ndasesapisoi vahe nungar ava ndayaracuai vahe mboaracua iyavei ava angaipa viyar pītumimbi vahe nungarsave tēi resape āgua” peye tēi. <sup>20</sup> “Aicatu avei ava mbahe ndosenducuai vahe mboaracua iyavei ava chīhiva-hemi nungar mbohe āgua. Esepia, areco co mborocuita vireco vahe opacatu mbahecuasa iyavei mbahe supi tupri vahe ité” peye tēi avei. <sup>21</sup> Pe pembohe vahe ambuae ava, ¿mahera ru ndapeyembohei pe ae? Pe pemombehu vahe ambuae ava mondaēhi āgua, ¿mahera ru pe ae avei pemonda no? <sup>22</sup> Pe, “Ndiyai pe aguasa” peye; pe teieté avei rumo ěgüe peye. Ndapesepia potai eté mbahe rahanga; pe avei rumo opa peñomi mbahe sepi vahe itūparo pipe sui. <sup>23</sup> Peyecomboivate ai co mborocuita rerecosa rese; ndapemboetei rumo Tūpa ipipe ahe mborocuita mboaviyeēhi pipe. <sup>24</sup> Supi eté icuachiapri aracahendar pipe aipo ehi: “Pe sui tēi ava ndoicuai vahe Tūpa iñehēñehe tēi serer maranehi rese yuvireco” ehi.

<sup>25</sup> Supi eté co tecocuer cuacua circuncisión resendar ahe aviye angara pēu, peroya tupri itese Moisés porocuita viña. Ndaperoya tupriise rumo, pe evocoyase inungar ndapeyembocircuncidai vahe peico. <sup>26</sup> Acoi ava ndoyembocircuncidai vahe, ahe rumo viroyase porocuita, ahe seroyapri inungar imbocircuncidapri yuvirecoi. <sup>27</sup> Acoi ndoyembocircuncidai vahe, oyapose

rumo mborocuaita yuvireco, ahe evocoyase omombe-hura pe cañi ãgua yuvireco. Esepia, yepe pereco Tũpa porocuaita viña, pe rumo ndapemboaviyei eté. <sup>28</sup> Judío supi eté vahe yaicose, ndahei yande yesupa judío recocuer rupi güeraño êgüe yahera. Iyavei circuncisión supi eté vahe ndahei yande retocuer rese güeraño tẽi avei no. <sup>29</sup> Judío ete ité rumo opihá pipe ité viroya Tũpa. Iyavei circuncisión supi eté vahe, Espiritu rembiapo yande piha pipe, ndahei porocuaita icuachiapri rembiapo tẽi. Evocoyase judío supi eté vahe oipisira omboeteisa Tũpa suindar ité, ndahei ava tẽi suindar.

### 3

<sup>1</sup> Evocoyase, ¿mbahe vo co aviye judío yande reco ãgua? ¿Yande yembocircuncidasa piha aviye? <sup>2</sup> Supi eté. Esepia, yipindar Tũpa omondo oñehe judío eta upe imboaviye ãgua. <sup>3</sup> Amove yepe ipãhu pendar nomboaviyeise ocuaita viña, ¿Tũpa avei tie êgüe ehira? <sup>4</sup> ¡Aní eté! Tũpa rumo supi tupri vahe ité secoi, yepe que ava opacatu semirañete ai tẽi yuvireco. Esepia, icuachiapri arachendar pipe aipo ehi:

“ ‘Supi tupri vahe Tũpa’ ehira nde ñehe rese yuvireco.

Sese ereiquesa ava porandusave, eresẽ tupriñora eso ichui” ehi.

<sup>5</sup> Yande reco rai pipe tẽi yamboyecuase Tũpa reco tupri, ¿mara yahera vo evocoyase? ¿“Tũpa ndahei supi tupri vahe yande reco raisa rese yande nupa” yahera tie? (Che rumo aipo ahe inungar-ra ava co ivi pipendar tẽi viña.) <sup>6</sup> ¡Aní eté! Esepia, Tũpa ndaheise supi tupri vahe viña, ndiyai chietera yande recocuer rese porandupa tupri ãgua chupe viña.

<sup>7</sup> Aviyeteramo oimera ava aipo ehi vahe: “Yande remira pipe sui tẽi ava omboetei catuse Tũpa supi eté vahe,

¿mahera pñha evocoyase angaipa viyar nungar yande rerecora viña?” ehi. <sup>8</sup> “Yayapora ayase mbahe naporai vahe mbahe tupri reime ãgua” ehi. Amove ava, “Pablo ondugüer reseve aipo ehi eté oporombohe” ehi tupri tēi yuvireco oreu. Aipo ehi tēi vahe rumo. Iya ité oipisira cañisa yuvireco.

*Opacatu yande angaipa viyar yaico*

<sup>9</sup> ¿Mara ehi ru evocoyase? ¡Yande judío yaico vahe ndahei eté ivate catu yande recocuer opacatu ambuae ava-ava tēi sui! Esepia, opa amboyecua Tūpa rovaque opacatu angaipa viyar yaico que judío, que ndahei vahe judío avei. <sup>10</sup> Supi eté icuachiapri arachendar pipe aipo ehi:

“¡Ndipoi eté ava seco catupri vahe, que ñepe angara viña!

<sup>11</sup> Ndipoi avei que ava Tūpa recocuer osenducua tupri vahe.

Ndipoi avei Tūpa oseca vahe yuvireco.

<sup>12</sup> Opacatu ava oguata mbahe tēi pipe yuvireco, co coti tēi avei secocuer yuvireco.

¡Ndipoi eté que ava mbahe tupri aposar, que ñepe angara viña!

<sup>13</sup> Ñehesa mbahe tēi eté, inungar tuvipa ndasovapisai vahe.

Oñehesa pipe oporombopa yuvireco.

Ahe ñehesa evocoyase inungar mboi naporai vahe oporomocañi tēi vahe.

<sup>14</sup> Ipipe oñehe rai opihavíracuá iteangasa pipe yuvireco.

<sup>15</sup> Ndayipitii oporapichi ãgua yuvireco.

<sup>16</sup> Setá ava omomara, omombaraisu avei oguatasa rupi yuvireco.

<sup>17</sup> Iyavei ndoicuai eté güeco tupri ãgua yuvireco.

<sup>18</sup> Ndipihañemoñetai eté Tūpa sui osiquiye ãgua yuvireco” ehi.



<sup>19</sup> Yande niha opa yaicua opacatu co mbahe omombehu vahe mborocuita aracahendar pipe, omombehu co porocuita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tūpa ñemoirosa pisi ãgua yuvireco’ ohesave aipo ehi. <sup>20</sup> Esepia, ndipoi chietera que ñepeï seco aviye vahe Tūpa rovaque co porocuita mboaviye pipe. Ahe mborocuita rumo oicua uca yande angaipa viyar yande reco.

*Cristo rese yande yeroya pipe* Tūpa yande pĩsirora

<sup>21-22</sup> Cūritei rumo Tūpa oicua uca yandeu ndahe iri mborocuita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayande mboyoavii eté. Yipive ité ahe imombehupri seci porocuita aracahendar pipe, iñehe mombehusareta rembicuachiagüer pipe avei. <sup>23</sup> Supi eté yande opacatu yayapo angaipa, ndayasupitii eté Tūpa reco porañetesa. <sup>24</sup> Ahe rumo oporoaisusa pipe, “Ereyavi mbahe che ñemoirosa pisi ãgua” ndehi iri yandeu. Esepia, ahe yande pĩsiro uca Guahir Jesucristo upe. Yande rumo ndayamboepii eté yande raisusa chupe. <sup>25-26</sup> Tūpa rumo ombou Guahir Cristo oipiyere vaheerã vuvi yande angaipa rese ñero ãgua. Sese yande yeroya pipe oime ñeroisa yandeu. Ipípe omboyecua güeco ñvi tuprisa. Yipisuive rumo güeco asiñhisa pipe oñemosañ aracahendar ava angaipa upe; cūritei rumo omboyecua ité güeco ñvisa yandeu, seco ñviño ité seco catupri vahe yande rerecose Tahir rese yande yeroya pipe.

<sup>27</sup> ¡Evocoyase ndiyai eté yande yeecomboivate ai ãgua sovaque! Esepia, ndahei porocuita mboaviye rese egüe

ehi, ahe rumo Cristo rese yande yeroya pipe ãgüe ehi yandeu. <sup>28</sup> Sese yaicua Tũpa, “Ereyavi mbahe che ñemoirosa pisi ãgua” ndehi iri Cristo rese yande yeroyase yandeu, ndahei mborocuaita mboaviyesa sui tẽi.

<sup>29</sup> ¡Tũpa niha opacatu ité ava Tũpa, ndahei ore judío oroico vahe Tũpa güeraño! <sup>30</sup> ¡Supi eté ñepeño ité secoi: sese yayeroyase Cristo rese, oyoya guasuño ité, “Ereyavi mbahe che ñemoirosa pisi ãgua” ndehi chira yandeu, yepera imbocircuncidapri viña, anise que ndahei vahe imbocircuncidapri viña no! <sup>31</sup> Ndahei rumo, “Ëgüe ehi tẽi vahe” yahe evocoi mborocuaita upe Jesucristo reroyasa pipe. Ipipe rumo yamboyecua evocoi mborocuaita ãgüe ndehi tẽi vahe.

## 4

### *Abraham recocuer sui yembohesa*

<sup>1</sup> Iyavei, ¿mara ehi pĩha yande ramoi Abraham recocuer aracahe? <sup>2</sup> Acoi mbahe güembiapo pipe sui tẽi oipisise güeco tupri ãgua Tũpa sui, oyemboivate aira oico ipipe viña. Ndiyai eté rumo ãgüe ehi Tũpa rovaque. <sup>3</sup> Esepia, icuachiapri aracahendar pipe aipo ehi: “Abraham oyeroya ité Tũpa rese. Sese Tũpa, ‘Co seco catupri vahe’ ehi chupe” ehi. <sup>4</sup> Co rumo yande yayapose mboraviqui, ahe yaipisi vahe ndahei porerecosa tẽi, ahe rumo mboraviqui repri ité yaipisi. <sup>5</sup> Yande rumo, yayeroyase Tũpa rese, Tũpa evocoyase yande pisira, ‘co seco catupri vahe’ ohesave. Esepia, ahe ãgüe ehi vahe ité oyese oyeroya vahe upe, yepe ndoyapoi chira mbahe aviye vahe chupe viña. <sup>6</sup> David mborerecuar aracahendar avei oñehe ava rorivetesá rese Tũpa seco catupri vahe nungar pisisa rese. Ahe rumo ndahei mbahe sembiapogüer rese tẽi oipisi. <sup>7</sup> Ahe aipo ehi aracahe:

“¡Sorivete acoi ava Tūpa iñeroise yangaipa rese, iyavei ndoyemomahenduha irise yangaipa rese chupe!

<sup>8</sup> ¡Sorivete avei ava, ‘Nde angaipa viyar ereico’ ndehi irise Tūpa chupe!” ehi.

<sup>9</sup> Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tūpa, “Co seco catupri vahe secoi” ehi Abraham upe oyese iyeroyasa rese. <sup>10</sup> ¿Marase pīha oipisi oyeupe nara sereco? ¿Oyembocircuncida renondeve pīha, anise ipare tie? Yípive ité. <sup>11</sup> “Toicua ava co seco catupri vahe che rese iyeroyase yuvireco” ehi Tūpa chupe. Sese imbocircuncidapri secoi. Ēgüe ehi Abraham opacatu ava oyeroya vahe Tūpa rese, ndoyembocircuncidai vahe yesupa nungar secoi. Ēgüe ehi Tūpa, “Co seco catupri vahe yuvirecoi” ehi avei ahe ava upe. <sup>12</sup> Supi eté yande ramoi Abraham opacatu ava oyembocircuncida vahe, Tūpa rese oyeroya vahe yesupa avei secoi. Abraham rumo oyeroya vahe Tūpa rese ndoyembocircuncida vîteiseve.

*Tūpa remimombehu imboavi*yesara sese yeroyasa pīpe

<sup>13</sup> Esepia, aracahe Tūpa aipo ehi Abraham upe, ichuin-dar upe avei: “Peipisira opacatu co ivi pe mahera” ehi. Ndahei Moisés porocuita mboyeroya pīpe Ēgüe ehi chupe, oyese yeroyasa pīpe sui eté rumo ahe oipisi ‘co seco catupri vahe’ ohesave. <sup>14</sup> Supi etese co mborocuita mboyeroysar güeraño oipisise co mbahe oime vaheřa chupe viña, evocoyase yande yeroyasa Tūpa rese Ēgüe ehi tēi etera, Tūpa remimombehugüer evocoyase Ēgüe ehi tēi vahe aveira viña no. <sup>15</sup> Esepia, co mborocuita mboaviyeēhisa pīpe ñemoirosa oime ava upe. Ndipoise rumo mborocuita, ndipoi chietera ahe porocuita mboyeroyaēhisa.

<sup>16</sup> Sese mbahe Tūpa remimombehugüer porerecosa yaipisira sese yande yeroyasa pipe, ahe semimombehugüer supí tuprí vahe opacatu yande Abraham suindar upe nara. Esepia, ndahei mborocuaita mboyeroyasar upe güeraño, ahe rumo opacatu yande Abraham nungar Tūpa rese oyeroya vahe upe nara. Evocoyase ahe opacatu yande ramoí secoi. <sup>17</sup> Icuachiapri aracahendar pipe aipo ehi: “Orombou ava eta ivi rupindar ramoirã” ehi. Co Tūpa niha Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yipindar.

<sup>18</sup> Yepe yavai eté seroya ãgua viña, Abraham rumo oyeroya ité Tūpa oyeupe ñehesa rese; sese ava eta ivi rupindar ramoí eté secoi Tūpa ñehe: “Setá oimera ava nde suindar” ehi vahe rupi tuprí ité. <sup>19</sup> Abraham evocoyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco reseve nañaroi eté guahi ãgua yuvireco viña. <sup>20</sup> Ndopoi eté Tūpa oyeupe ñehesa reroyasa sui. Ahe rumo oyeroya catu ité sese iyavei omboetei eté. <sup>21</sup> “Supi eté Tūpa vireco opiratasa opacatu oñehengagüer mboaviye ãgua” ehiño ité opiha pipe. <sup>22</sup> Sese Tūpa, “Co seco catuprí vahe secoi” ehi iyeroyasa rese chupe.

<sup>23</sup> Co ñehesa ndahei Abraham upe güeraño. <sup>24</sup> Yandeu avei niha. Esepia, “Co seco catuprí vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús. <sup>25</sup> Esepia, ahe imondoprí secoi yande angaipa repirã. Ipare Tūpa ombogüerayevi yande pisi ãgua seco catuprí vahe nungar oyeupe.

## 5

*Tūpa, “Peyavi mbahe” ndehi iri*

<sup>1</sup> Sese yaico mbahe tupri pipe Tūpa, “Peyavi mbahe” ndehi irise yandeu yande Yar Jesucristo rembiapo sui sese yande yeroyasa pipe. <sup>2</sup> Esepia, Jesucristo sui niha yareco co Tūpa suindar porovasasa yayeroyase sese. Ipipe avei yayemoviracuaño ité yaico, yayemboviha avei. Esepia, yaicua Tūpa piri yande reco āgua imborerecuasave. <sup>3</sup> Ndahei rumo sese güeraño yayemboviha, yande yemombaraisusa rese avei niha yayemboviha yaico. Esepia, yaicua ahe yande mbohe yande ñemosa āgua, <sup>4</sup> iyavei yañemosañose, yasē tuprira yande recoāhasa sui, ahese yaicua yaipisi vaheerā mbahe aviye vahe Tūpa suindar yepi. <sup>5</sup> Iyavei ahe yande remiaro nayamoha tēi chira sereco. Esepia, Tūpa ombou ité oporoaisusa yandeu oEspíritu Santo yandeu ombou vahe pipe.

<sup>6</sup> Yande ae ndayaicatui yande ñepisiro āgua yande recocuerai sui, Cristo rumo osupitise ari chupe, omano opacatu yande angaipa rese. <sup>7</sup> Aviyeteramo oimera que ñepei ava omano vaheerā ambuae ava aviye vahe upe nara; yepe que ava recocuer supi eté aviye aira viña, seni rumo ndipoi eté que ava, “Che tamano sepirā” ehi vaheerā chupe. <sup>8</sup> Yepe yande angaipa viyar yaico yipindar, Tūpa rumo omboyecua yande raisusa; ombou Cristo imano āgua yande angaipa repirā. <sup>9</sup> Ipipe sui cūritei, “Peyavi mbahe” ndehi iri chira. Sese nomboui chietera oñemoirosa yandeu. <sup>10</sup> Esepia, yamotarēhimbar yaico vitese, ahe Guahir manosa pipe sui yande reroyevi iri oyeupe mbahe tupri pipe; ocuerayevisa pipe evocoyase oicatu ité yande p̄siro. <sup>11</sup> Ndahei co reseño ēgüe yahera, yaviha catu aveira Tūpa rese, yande Yar Jesucristo rese avei. Ichui niha ndipo iri mbahe Tūpa rovaque yande rese.

*Adán iyavei Cristo resendar ñehesa*

<sup>12</sup> Supi eté Adán sui oime angaipa ivi pipe, ichui avei oime manosa opacatu ava upe. Esepia, opacatu ité oyapo angaipa yuvireco. <sup>13</sup> Ndipo vîteise Moisés porocuaíta, oime voi eté angaipa co ivi pipe. Yepe tie ndicuasa vîtei angaipa porocuaíta ndipoise viña, <sup>14</sup> Adán reco sui tupri ité rumo ava omanoño ité oangaipa pipe yuvireco. Ëgüe ehiño ité yuvireco Moisés recose, yepe ahe ava yuvirecoi vahe angaipa ndahoyoyai Adán angaipa mborocuaíta mboaviyeêhisa resendar rese viña. Ahe Adán rese omboyecua mbia ou vaheã.

<sup>15</sup> Tūpa porerrecosa ombou vahe rumo yandeu ndahoyoyai eté Adán angaipa rese. Esepia, Adán rembiavi sui setá ava omano; Jesucristo rembiapo sui rumo Tūpa ombou oporerrecosa poropĩsirosa yandeu. Ahe rumo aviye catu vahe ava eta upe nara. <sup>16</sup> Ahe ñepei ava angaipa rumo ndoyoyai eté Tūpa poropĩsirosa ombou vahe rese yandeu. Esepia, ñepei ava angaipa sui ou Tūpa ñemoirosa; oporerrecosa rumo Tūpa ombouño ité ava eta mbahe oyavi ati vahe upe nara yangaipa mocañi ãgua. <sup>17</sup> Supi eté ñepei ava angaipa sui oimeño ité manosa opacatu yandeu. Yande rumo yaipisi mbahe ipĩrata catu vahe ichui, ahe Tūpa porovasasa tuvichá vahe ité iyavei iporerrecosa, “Peyavi mbahe” iheêhisa resendar. Sese yareco ité tecovesa apirêhi vahe yandeyeupe nara ñepei ava sui, ahe Jesucristo.

<sup>18</sup> Evocoyase inungar Adán rembiapo ai güeru Tūpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tūpa ñemoirosa pisiêhi ãgua ‘tovireco tecovesa apirêhi yuvireco’ oya. <sup>19</sup> Esepia, ñepei ava Tūpa reroyaêhisa sui setá oime ava angaipa viyar; ëgüe ehi aveira ñepei ava mboyeroyasa sui setá aveira ava vireco güeco catuprisa Tūpa rese yuvireco.

<sup>20</sup> Supi eté porocuaita ouse aracahe, ahese angaipa yaposu catu ité. Yepe ãgüe ehi viña, Tũpa porovasasa rumo ivate catu ité ichui. <sup>21</sup> Evocoyase inungar angaipa ipĩrata yandeu yande mano ãgua viña, ãgüe ehi avei rumo Tũpa oporovasasa ipĩrata vahe pipe yande pĩsi seco catupri vahe nungar yande rereco ‘toipisi tecovesa apirẽhi vahe che Rahir Jesucristo rembiapo sui’ oya.

## 6

*Angaipa upe omano vahe nungar yaico; Cristo rese yaicose rumo oicove vahe ité yaico*

<sup>1</sup> Evocoyase, ¿iya iri pĩha yayapo vite angaipa yaico Tũpa yandeu oporovasasa mboyecua catu ãgua? <sup>2</sup> ¡Aní chietera! Esepia, yande niha senosepri angaipa sui. Evocoyase ndiya iri eté yayapo viteño angaipa yaico. <sup>3</sup> ¿Ndapeicuai vo pe yañeapiramose Jesucristo rer pipe, ndoyavii yamano vahe ité sese? <sup>4</sup> Yande ñeapiramose, aviye acoi ñotimbri yaico Cristo rupive yande mbogüer-ayevi iri ãgua iyavei yande recocuer mopiasu ãgua avei, inungar acoi Cristo ocuerayevi Vu reco pĩratasa pipe.

<sup>5</sup> Yande omano vahe nungar yaicose supive, ãgüe yahe aveira yande yacuerayevi supi. <sup>6</sup> Yaicua avei niha yipindar yande recocuerai yaticapri nungar curusu rese Cristo rupive, “Che recocuerai tocañipa che sui” yande hesa pipe, iyavei yande angaipa pipe mbiguai tẽi nungar yande recoẽhi ãgua. <sup>7</sup> Esepia, acoi omano vahe ndoyapo iri angaipa yuvireco. <sup>8</sup> Yande avei niha omano vahe nungar Cristo rese yaico. Evocoyase yayeroya avei yaicove va-herã sese. <sup>9</sup> Yande niha yaicua, Cristo ñepei reseve ocuerayevi, nomano iri chietera. Esepia, manosa ndoicatu iri eté chupe. <sup>10</sup> Supi eté omanose Cristo, omano ñepei reseve opacatu angaipa mocañi ãgua; cũritei rumo oicove Tũpa upe nara. <sup>11</sup> ãgüe peye avei pe, “Che omano vahe

nungar aico angaipa upe” peyera; “Che rumo Tūpa upeño ité aicovera yande Yar Jesucristo rese che recosa pipe” peye aveira.

<sup>12</sup> Sese aní peico vite angaipa pīratasavrive pe cuai āgua pe remimbotarai mboyeroyasa pipe. <sup>13</sup> Aní peyemondo angaipa upe mbahe tēi apo āgua. Peyemondo catu Tūpa upe. Esepia, pe inungar ava ocuerayevi iri vahe peico. Sese peyemondo tupri ité Tūpa upe mbahe tupri apo āgua. <sup>14</sup> Evocoyase, pe angaipa ndape cuai iri chira pe rereco. Esepia, ndapeicoi Moisés porocuita pipe; pe rumo Tūpa porovasasa pipe peico.

*Yembohesa mbiguai tēi recocuer sui*

<sup>15</sup> Ndayaico iri mborocuita pipe tēi, yaico rumo Tūpa porovasasa pipe. Evocoyase, ¿“Tayapo vite angaipa” yahera pīha? ¡Aní chietera! <sup>16</sup> Pe niha peicua que ava pemboyeroyase, ipovri pendar evocoyase peico. Pemboyeroyase Carugar angaipa apo āgua, ahe evocoyase pe reco mocañi tēira. Tūpa pemboyeroyase rumo, ahe evocoyase pe reco mohivira. <sup>17</sup> Aviye Tūpa upe. Esepia, pe yipīndar mbiguai tēi nungar peico angaipa pipe viña, cūrītei rumo pemboyeroya pe pihave ité porombohesa peipisi vahe. <sup>18</sup> Ñepeí reseve pe angaipa sui Tūpa pe renosese, pe evocoyase mbiguai nungar mbahe supi tupri vahe apo āgua peico. <sup>19</sup> (Che amboyoya tecocuer mbahe co ivi pipendar rese imombehu pēu. Esepia, yavai vite ité pēu co ñehesa renducua tupri āgua.) Yipīndar pe retocuer pereco mbahe tēi pipe mbahe naporai vahe apo āgua. Ēgüe peye rumo pe cūrītei pe reco mohivi āgua peico mbahe tupri pipe ñepeí reseve Tūpa upe pe reco āgua.

<sup>20</sup> Pe peico vitese mbiguai tēi nungar pe angaipa pipe, ahese ndapeyapo vitei mbahe supi tupri vahe; <sup>21</sup> cūrītei rumo pechī tēi ichui, ahe niha ndape pītīvii eté pe



recocuer rese, iyavei pe reraso pota manosa apirēhi vahesave yepi. <sup>22</sup> Cūrītei rumo angaipa sui senosepri peico Tūpa povrive pe reco āgua. Ichui mbahe tupri oime pēu. Ahe niha ombou oyeupe nara ité pe reco tupri āgua. Ipīpe sui peicora apirēhi vaherā. <sup>23</sup> Angaipa niha ombou manosa tēi yandeu, Tūpa rumo oporerecosa ombou tecovesa apirēhi vahe yandeu yande Yar Jesucristo rese yande recose.

## 7

### *Mendasa sui yembohesa*

<sup>1</sup> Che rivireta, pe niha peicua tupri mborocuaita, peicua avei ahe porocuaita povriveño ité opacatu yaico yaicove vītese co ivi pīpe. <sup>2</sup> Esepia, inungar cuña omenda vahe, imer oicove vītese, iporocuitavrive viteño ité secoi yepi. Omanose rumo imer ichui, ahe cuña ndahe iri omer porocuitavrive secoi. <sup>3</sup> Acoi cuña omer recove vīteseve, virecose ambuae cuimbahe, oyemboaguasa tēi evocoiyase; acoi omanose rumo imer ichui, ndaseco iri ipovrive. Ahe iyacatu ité omenda yupagüe iri; ahese ndahei yaguasa tēi cute.

<sup>4</sup> Che rivireta, pe niha ēgüe peye avei Cristo rese peico vahe; Cristo manosa sui ndahe iri Moisés porocuitavrive peico Cristo rese peico āgua. Ahe niha acoi ocuerayevi vahe. Sese yande recocuer ēgüe ndehi tēi vahe Tūpa upe. <sup>5</sup> Esepia, yande yaicove vītese yande reco ai pīpe, ahe porocuaita renduse, yaipota catu mbahe tēi pīpe yande reco āgua. Ipare rumo ahe manosave tēi yande reraso ucara viña. <sup>6</sup> Cūrītei rumo yande omano vahe nungar yaico acoi porocuaita pīpe yaico vahecuer sui. Ēgüe yahe, yasē ichui Tūpa upe mbahe apo āgua Espiritu sui yande reco pīasu pīpe. Ndahe iri mborocuaita icuachiapri yipindar vahe pīpe yaico.

*Angaipa oime vahe yande rese*

<sup>7</sup> ¿“Tūpa porocuaita angaipa” yahera pīha? ¡Aní eté; ndahei eté ahe angaipa! Co rumo ndaicuai chietera che angaipa Tūpa porocuaita ndipoise viña. Supi eté che ndaicuaise, “Ndapeipota rai chira ambuae ava mbahe” ehi vahe mborocuaita pipe, ahese ndaicuai chiaveira che mbahe pota raisa viña. <sup>8</sup> Aicuase mborocuaita, ahese angaipa ipīrata catu cheu. Ahe mborocuaita apo potaēhisa pipe che querēhi catu opacatu che remimbotarai tēi apo āgua. Esepia, mborocuaita porēhi angaipa aviye ndipoi vahe viña. <sup>9</sup> Yipindar Tūpa porocuaita ndaicua viteise, ndoyavii aviye vahe ité che reco areco viña. Porocuaita aicuase rumo, aipota rai angaipa apo āgua. <sup>10</sup> Che evocoyase acañi tēi vahe rā aico ipipe viña. Ahe porocuaita che recove apirēhi āgua mbou rāgüer sui, che mondo ucaño itera manosa apirēhi vahe pipe tēi viña. <sup>11</sup> Esepia, angaipa ahe porocuaita pipe che mbopa ité. Ahe ipipe avei che mocañi tēira viña.

<sup>12</sup> Evocoyase co porocuaita ndaseco marai vahe ité, supi tupri vahe ité, aviye vahe avei. <sup>13</sup> ¿Co porocuaita aviye vahe pīha che rereco che mano āgua tēi? ¡Aní eté! Angaipa tēi rumo ēgüe ehi che rereco. Evocoyase co porocuaita cuasa sui oipota catu uca mbahe tēi apo āgua cheu. Ipipe aicua angaipa oime vahe che rese. Ēgüe ehi avei ahe porocuaita omboyecua tupri ité angaipa mbahe tēi vahe yandeu.

<sup>14</sup> Yaicua niha porocuaita Tūpa suindar, che tēi rumo imondopri aico angaipa mboyeroa āgua. <sup>15</sup> Che rumo ahese ndaicuai mbahe oime vahe cheu. Esepia, che remimbotar ayapo pota vahe ndayapoi; mbahe che remimbotarēhi rumo ayapo. <sup>16</sup> Che rumo ayapose mbahe ndayapo potai vahe, ahese aicua co porocuaita aviye vahe. <sup>17</sup> Evocoyase ndahei cheyesui eté ēgüe ahe, angaipa tēi

rumo ãgüie ehi che mbohe uca. <sup>18-19</sup> Esepia, che aicua ndipoi eté mbahe aviye vahe che reco ai rese; sese yepe che ayapo pota ité mbahe aviye vahe viña, ndaicutui eté rumo yapo. Iyavei yepe ndayapo potai mbahe tēi viña, che rumo ayapoño ité. <sup>20</sup> Sese ayapo vîteño itese mbahe ndayapo potai vahe, ndahei rumo che ité ayapo, che pīha pipe angaipa oime vahe, ahe tēi rumo oyapo uca cheu.

<sup>21</sup> Sese che aicua oime che cuaisar che rese. Esepia, ayapo potase mbahe aviye vahe yepi viña, ahe rumo oyapo uca pota voiño ité mbahe naporai vahe cheu yepi. <sup>22</sup> Che pīha pipe rumo Tūpa porocuita aipotá iteanga tēi, <sup>23</sup> che rumo aicua che pīha pipe oime ambuae mbahe, mbahe tupri apo potaēhisar cheu, ahe angaipa tēi oime vahe che rese. Ahe mbiguai nungar tēi che rereco.

<sup>24</sup> “¡Che paraisu ité!, ndaicatu iri eté, ¿uma pīha co mbahe tēi sui che renosera viña?” ahe cheyeupe vichico.

<sup>25</sup> Tūpaño ité oicatu Guahir Jesucristo rese. “Aviye” yande Ru Tūpa upe. ãgüie ehi ahese mbahe cheu; Tūpa porocuita amboaviye pota viña, che remimbotarai tēi rumo che rereco uca angaipa povrive.

## 8

### *Yaico vaherã Tūpa Espíritu rese*

<sup>1</sup> Cūritei rumo ndipo iri Tūpa ñemoirosa yandeu Jesucristo rese yaicose. <sup>2</sup> Esepia niha, Jesucristo rese yaicose, yande cuaisar Espíritu tecovesa mondosar yande renose angaipa povri sui, manosa sui avei. <sup>3</sup> Esepia, yande remimbotarai rese ndayaicutui Moisés porocuita mboyeroa āgua, ahe avei evocoyase ndoicutui eté yande reco moingatu. Tūpa rumo oicatuño ité. Esepia, Guahir ombou yande nungar tupri ité ‘toyemondo ava angaipa repirã’ oya. ãgüie ehi imocañi opacatu yande angaipa yande sui, yande remimbotarai avei. <sup>4</sup> Ahe ãgüie ehi yande

yamboaviye vaherã mborocuita. Esepia, ndayaico iri yande remimbotar tõi pipe. Yaico rumo Espiritu aviye vahe rese.

<sup>5</sup> Esepia, acoi yuvirecoi vahe rumo güemimbotar tõi pipe, güecocueraí reseño tõi ipihañemoñeta yuvireco; Espiritu rese yuvirecoi vahe rumo semimbotar rese ipihañemoñeta catu yuvireco. <sup>6</sup> Iyavei acoi güemimbotarai rese tõi ipihañemoñeta vahe, ahe omano itera apirẽhi yuvireco. Ipihañemoñeta vahe rumo Espiritu suindar mbahe rese, vírecora tecovesa apirẽhi vahe mbahe tupri pipe yuvireco. <sup>7</sup> Esepia, acoi güecocueraí reseño tõi ipihañemoñeta vahe, ahe Tũpa amotarẽhimbar yuvirecoi. Ndoipotai eté iyavei ndoicatui Tũpa porocuita mboyeroya ãgua yuvireco. <sup>8</sup> Ëgüe ehi eté, acoi yuvirecoi vahe güemimbotarai pipe, ndoicatui eté Tũpa remimbotar apo ãgua yuvireco.

<sup>9</sup> Pe rumo ndapeico iri pe remimbotarai pipe. Peico rumo Tũpa Espiritu rese, ahe perecose peyese. Acoi ndovirecoi vahe rumo Espiritu Cristo suindar, ndahei eté chupendar. <sup>10</sup> Cristo secoise rumo pe rese, yepe pe rete ocañi tõi vaherã angaipa sui viña, pe espíritu rumo oicoveño ité. Esepia, Tũpa, “Peyavi mbahe” ndehi iri pẽu. <sup>11</sup> Acoi Tũpa Espiritu secoise pe rese, Tũpa evocoyase omondora tecovesa piasu pe retecuer upe oEspiritu pe rese secoi vahe pĩratasa pipe. Esepia niha, ipipe ité ombogüerayevi Guahĩr Jesucristo.

<sup>12</sup> Ëgüe ehi che rivireta, yareco yande cuaita, ndahei rumo yande remimbotarai pipe yande reco ãgua.

<sup>13</sup> Esepia, pe peicoño itese pe remimbotarai pipe, ahese pecañi tẽira; pemombopase rumo Espiritu pipe peyesui, ahese peicovera apirẽhi vaherã.

<sup>14</sup> Esepia, opacatu Tũpa Espiritu ombohe vahe, Tũpa rahĩr ité yuvirecoi. <sup>15</sup> Supi eté pe Espiritu peipisi vahe

ndapembosiquiye uca iri pe rereco, ahe rumo pemoingo Tūpa rahir ité pe reco āgua. Ahe avei, “¡Che Ru!” pe mbohe uca chupe. <sup>16</sup> Co Espíritu avei oicua uca yande espíritu upe Tūpa rahir yande recose. <sup>17</sup> Evocoyase yaipisi aveira mbahe yande Ru Tūpa ombou vaherã yandeu; ahe oyoya Cristo reseve yaipisira, Cristo paraisu agüer pīpe ité yaicose yareco vaherã teco porañetesa ipiri curi.

*Teco porañetesa ou vaherã curi*

<sup>18</sup> Cūrítei rumo yande paraisusa ndoyoyai eté teco porañetesa yande rese ou vaherã rese. <sup>19</sup> Opacatu Tūpa rembiapocuer osãro vite ité opacatu oquerēhisa pīpe, osepia pota ité teco porañete vahe tahir yuvirecoi vahe rese. <sup>20</sup> Esepia, Tūpa rembiapo ndahe iri eté yipindar nimarai vahe nungar. Ndahei rumo oyesui tēi ēgüe ehi, Tūpa ité, “Ēgüe tehi” ehi chupe, ombouse angaipa repri ava upe. Mbahe sembiapocuer rumo osãroño ité <sup>21</sup> güeco opa tēi vaherã sui ñepisiro āgua teco porañete vahe Tūpa rahir vireco vahe rupiti āgua curi. <sup>22</sup> Yande niha yaicua aracahe suive opacatu mbahe Tūpa rembiapo oiporara mbaherasicuer yuvireco cuña imembī rasi vahe nungar. <sup>23</sup> Ndahei rumo ahe güeraño ēgüe ehi yuvireco, yande avei ēgüe yahe. Yande yareco ité Espíritu, ahe yipindar vahe yaipisi vaherã ichui curi. Yayemombaraisu, yasãro vite yande querēhisa pīpe Tūpa guahir ité yande rereco āgua, yande retecuer recuñaro āgua avei. <sup>24</sup> Esepia, yande niha yañepisiro ité yande remiaro reroya pīpe; sese acoi yasepia vahe mbahe yande remiaro, nayasãro iri. Ndipoi ava osãro vite tēi vahe mbahe güembiepia. <sup>25</sup> Acoi mbahe yande remiaro ndayasepia viteise rumo, yasãro vite yande ñemosasa pīpe sereco.

<sup>26</sup> Ēgüe ehi avei Espíritu yande pĩtivii ndayaicatu irise. Esepia, ndayaicuai eté mara yahera yayeroqui, co Es-

píritu Santo rumo oporandu ité Tūpa upe yande rese oyemopoasesa pipe. <sup>27</sup> Iyavei Tūpa, ahe oicua vahe opacatu yande pihañemoñetasa, oicuaño ité Espíritu mbahe omombehu pota vahe oyeupe. Esepia, Espíritu oporandu chupe semimbotar rupi yande seroyasar yaico vahe rese.

*Yasecopipa itera mbahe tēi*

<sup>28</sup> Tūpa niha yande poravo güemimbotar rupi. Yepe yaicua mbahe tēi oime yandeu viña, Tūpa rumo opacatu mbahe oyapo yandeu mbahe tupri reime água yande raisusave. <sup>29</sup> Esepia, yipive Tūpa yande cua, yande poravo Guahir Jesucristo nungar ité yande reco água ‘ahe che Rahir tenonde catu vahe tasecoi opacatu ambuae che rahir sui’ oya. <sup>30</sup> Iyavei Tūpa yipisuive ahe yuvirecoi vahe oiporavo. Chupe oñehe oyeupe nara seco água. Ipare, “Co seco catupri vahe” ehi chupe; ahe chupe avei omondo teco porañetesa.

<sup>31</sup> ¿Mara yahe irira vo chupe? ¡Tūpa niha yande repisar secoi, sese ndoicatu iri eté yande amotarēhimbar yuvireco! <sup>32</sup> Tūpa niha ombou ité Guahir imano água opacatu yande rese. Sese yaicua ombou aveira opacatu mbahe yandeu yande pñivii água Tahir rese yande recose. <sup>33-34</sup> Sese ndiyai eté ava upe, “Pecañi tēira, peyavi pe recocuer” ihe água yande iporavopri yaico vahe upe yuvireco. Esepia, Tūpa opa omocañi yande angaipa yande sui Cristo omanose sepirã, iyavei ocuerayevise. Cūrítei Cristo Vu acato coti, “Co cheundar ité yuvirecoi” ehi yande rese oyerure yepi. <sup>35</sup> ¿Mbahe pīha yande mboyepepīra Cristo yande raisusa sui viña? ¿Que yande paraísusa, mbahe yavai vahe yandeu, yande momaramara tēisa, que tieporēhi, anise que yande turucuarã ndipoise, que mbahe tēise yandeu, yande yuca potase tie

yuvireco? <sup>36</sup> Inungar icuachiapri aracahendar pipe aipo ehi:

“Oyemoingatu voi ari rupi yande yuca ãgua yuvireco nde-  
undar yaicose, ovesa yucapirã nungar tēi yande  
rereco yuvireco” ehi

aracahe.

<sup>37</sup> Opacatu rumo co mbahe oimese yandeu, yasecopipa ité ahe yande raisusar recocuer pipe sui. <sup>38</sup> Sese che aroya ité Tūpa yande raisu viteño itera yepi yepe que yamanora, anise que mbahe oime vahe yandeu yande recove vitesse. Ndayande mboyepēpi chiaveira ichui que Tūpa rembiguai, que seco ivate vahe, seco pīrata vahe ndayasepi ai vahe, que cūritei mbahe oime vahe yandeu, anise que mbahe oime vahe rã curi. <sup>39</sup> ¡Ndayande mboyepēpi chiaveira que iva pendar mbahe, anise que mbahe ivi pipendar, que ambuae mbahe Tūpa rembiapo iporoaisusa sui omboyecua vahe opacatu yande Yar Jesu-cristo recocuer pipe yandeu!

## 9

### *Tūpa oiporavo Israel oyeupe nara aracahe*

<sup>1</sup> Che Cristo reroyasar che reco pipe supi eté añehe, ndopombopai. Tūpa Espiritu oicua ité che pihañemoñetasa supi vahe. <sup>2</sup> Ndavihai eté che piha pipe; oime mbahe tasi vahe cheu yepi. <sup>3</sup> Che aipota tēi opacatu che mu judío ñepisiro ãgua yuvireco viña. “Tacañi tēi Cristo porēhi icañi tēiēhi ãgua yuvireco” ahera viña. <sup>4</sup> Ahe niha Israel suindar yuvirecoi, aracahe Tūpa oiporavo vahe guahirguã. Ahe ipāhuve avei secoi güendigüer porañetesa pipe, iyavei omondo ité oñehe güemimbotar, oporocuita avei chupe nara viña ‘tache mboetei oyeruresa pipe che rētave yuvireco’ oya, iyavei, “Amboaviye itera che ñehe pe rese” ehi yuvireco chupe.

<sup>5</sup> Ahe avei niha yande ramoi yipindar vahe suindar yuvirecoi, Tūpa Rembiporavo Poropĩsirosar avei ahe ichuindar oyesu vahe. Ahe Poropĩsirosar niha Tūpa ité, ivate catu vahe secoi opacatu sui. Sese, ¡timboeteisa catu yepi! ¡Ēgüe tehi apirēhi!

<sup>6</sup> “Tūpa nomboaviyei Israel upe oñehe imombehupri” ndapeyei chira. Esepia, ndahei opacatu Israel suindar supi tupri vahe. <sup>7</sup> Iyavei ndahei opacatu Abraham suindar tahir supi tupri vahe yuvireco. Esepia, Tūpa aipo ehi: “Nde rahir Isaac sui rumo oimera nde suindar sovasapri” ehi chupe. <sup>8</sup> Co rumo osenducua uca yandeu ndahei Abraham suindar yuvinose vaheño ité Tūpa rahir yuvirecoi, Tūpa remimombehu rupi yuviroha vahe güeraño rumo ichuindar ité yuvirecoi. <sup>9</sup> Esepia, Tūpa Abraham upe aipo ehi aracahe: “Co ari rupi avei ayevíra curi, ahese oimera Sara membri ndeu” ehi.

<sup>10</sup> Ndahei rumo co reseño, tahir Isaac rese avei. Esepia, ocuacuase sembireco Rebeca imembi cōi, ahe icōi vahe yesupa rumo ñepeño ité. <sup>11-13</sup> Ahe ndoyuviroha viteise, ndoyapo viteise mbahe que aviye vahe, que naporai vahe yuvireco, Tūpa aipo ehi ichi Rebeca upe: “Yipindar oha vahe nde membri ahe omboyeroyara ipandar” ehi. Co oyoya ité icuachiapri rese acoi aipo ehi vahe: “Che asaisu ité Jacob, Esaú rumo ayamotarēhi” ehi. Sese yaicua iya ité Tūpa upe ava poravo güemimbotar rupi, ndahei seco aviye vahe rese.

<sup>14</sup> ¡Sese pñha Tūpa upe, “Ndaseco tuprii vahe” yahera? ¡Aní eté! <sup>15</sup> Esepia, acoi Moisés upe aipo ehi: “Aiparaisuerecora ava, asaisu aveira che remimbotar rupi” ehi. <sup>16</sup> Supi eté ndahei yande remimbotar rupi tēi, ndahei avei yande pĩratasa rupi Tūpa oyapo mbahe; ahe rumo oporoparaisuerecosa pĩpe mbahe oyapo yandeu. <sup>17</sup> Supi eté Tūpa aipo ehi mborerecurar guasu Egipto



pendar upe aracahe: “Che oromoingue uca mborerecuar nde reco ãgua che pĩratasa mboyecua ãgua nde sui, che rer mboetei ãgua avei opacatu ava upe co ivi pĩpe” ehi. <sup>18</sup> Ëgüe ehi oporoparaisuereco güemimbotar rupi. Güemimbotar rupi avei omboavai viroya ãgua ava upe.

<sup>19</sup> Aviyeteramo oimera que amove pe pãhu pendar aipo ehi vahe, “Ndiyai evocoyase Tũpa upe, ‘Pe peyavi mbahe’ he ãgua yandeu. Esepia, ndipoi eté niha ava, ‘¡Aní!’ ehi vaherã Tũpa remimbotar upe” ehira. <sup>20</sup> “Ndiyai eté rumo Tũpa poepĩ ãgua ndeu” ahera aipo ehi vahe upe. Inungar ñaihu mbahemoinda ndiyai, “¿Mahera che apo rai tẽi eve?” ihe ãgua oaposar upe. <sup>21</sup> Ñaihu rese oporaviqui vahe rumo güemimbotar rupi oyapora mbahe yuvireco sese. Oicatu ichui aviye catu vahe apo, oicatu avei ambuae iporupirã tẽi apo ãgua.

<sup>22</sup> Tũpa rumo oñemosa pare iya ité oñemoirora, opĩratasa mboyecua ãgua ocañi tẽi vaherã upe. <sup>23</sup> Ëgüe ehi avei yapo güemimbotar rupi güeco porañetesa ivate vahe mboyecua ãgua yandeu. Esepia, yande paraisuereco iyavei yĩpisuive teco ori porañetesa omoingatu yandeu aheve yande reique ãgua. <sup>24</sup> Yande avei yande renoi oyeupe, que judío, anise que ndahei vahe judío yande recose. <sup>25</sup> Esepia, Oseas rembicuachiagüer pĩpe aipo ehi:

“Acoi ava ndahei vahe cheundar, chupe,  
‘Cheundar ité’ ahera, iyavei acoi ava ndahei vahe saisupri  
yuvirecoi, chupe, ‘Che rembiaisu ité’ ahera” ehi.

<sup>26</sup> “ ‘Pe ndahei vahe cheundar peico’ ehi vahesave, ahe chupe, ‘Tũpa oicove vahe rahir ité’ hesara” ehi.

<sup>27</sup> Isaiás rumo aipo ehi israelita upe: “Yepe Israel suindar setá iteangara viña inungar ivi cuhi, moviro tẽi rumo oñepisirora yuvireco. <sup>28</sup> Esepia, yande Yar omboaviye vaira oñehe ava viroyasarẽhi mocañi ãgua co ivi pĩpe” ehi.

<sup>29</sup> Oyoya avei ambuae Isaías remimombehugüer yipindar vahe rese:

“Yande Yar seco pĩrata catu vahe noipĩsirose que moviro yande ramoi yandeu, yacañipa tẽira viña inungar tecua guasu Sodoma, Gomorra reseve yuvireco” ehi.

*Judío yuvirecoi vahe iyavei ñehesa pĩsirosa resendar*

<sup>30</sup> ¿Mara yahera vo evocoyase? Yaicua ava ndahei vahe judío, yepe ndahei osecá vahe güeco catupri ãgua yuvireco viña, Cristo rese oyeroyasa pipe rumo vireco ité güeco catupri Tũpa rovaque. <sup>31</sup> Judío yuvirecoi vahe rumo oipota tẽi güeco tupri ãgua ité Tũpa porocuita mboyeroya pipe viña, ndoicatui eté rumo supiti yuvireco. <sup>32</sup> Esepia niha, ndahei oyeroyasa pipe ité osecá oñepihiro ãgua, ahe rumo co mborocuita mboyeroya sui tẽi Tũpa rese yuvirecoi pota viña. Ahe evocoyase ndoyavii oyepiapi vahe “ita yepiapisá” rese yuvireco. <sup>33</sup> Aipo ehi tupri icuachiapri arachendar pipe:

“Che amondo Sión ve ñepeí ita yepiapisá, ahe oporoieiti vahe.

Acoi sese oyeroyá vahe rumo, nomochi ucai chietera oyesui” ehi Jesús recocuer upe.

## 10

<sup>1</sup> Che rivireta, che aipota che piha pipe ité iyavei ayerure Tũpa upe che mu judío recocuer rese ‘toñepihiro yuvireco’ che yapave. <sup>2</sup> Supi eté iquerẽhi ité Tũpa upe mboraviqui apo ãgua yuvireco viña. Oquerẽhisa sui rumo oyavi senducuaẽhisa pipe yuvireco. <sup>3</sup> Esepia, ndoicua potai mara ehi Tũpa ava pisi oyeupe. Sese oyesui tẽi osecá güecocuer tupri pipe ‘tomoingatu Tũpa opiha yande pisi ãgua’ ohesave yuvireco viña. Ipipe sui nomboyeroyai eté Tũpa remimbotar güeco mbocatupri ãgua

ité yuvireco. <sup>4</sup> Esepia, Cristo recocuer pipe imboaviyesa tupri Moisés porocuaíta, “Peyavi mbahe che ñemoirosa pisi ãgua” ehiêhi ãgua Tûpa oyese oyeroya vahe upe.

<sup>5</sup> Co yande reco catupri ãgua porocuaíta pipe sui, Moisés aipo ehi icuachía: “Acoi ava omboaviye tupri vahe opacatu co mborocuaíta, ipipe sui yuvirecovera” ehi. <sup>6</sup> Tûpa, “Peyavi mbahe che ñemoirosa pisi ãgua” heêhi ãgua rumo yande yeroyasa pipe, “Ava vo oyeupira ivave Tûpa Rembiporavo reroyi ãgua” ndapeyei chira. <sup>7</sup> Iyavei, “Ava vo ogüeyira omano vahe pâhuve Tûpa Rembiporavo mboyeupi uca ãgua” ndapeyei chiaveira. <sup>8</sup> ¿Mara peyera evocoiyase pe piha pipe? “Co ñehesa namombriveimi pe sui, pe yuru pipe ité, pe piha pipe avei secoi” peyera. <sup>9</sup> “Jesús, che Yar” peyese, pe piha pipe peyeroyase avei Tu imbogüerayevisa rese, ahese ipĩsiropri peicora. <sup>10</sup> Esepia, yande piha pipe yayeroya Jesús rese. Ahese Tûpa, “Co seco catupri vahe” ehira yandeu. Iyavei yamombehuse sese yande yeroyasa, ahese ipĩsiropri yaicora.

<sup>11</sup> Esepia, icuachiapri aracahendar pipe Tûpa aipo ehi: “Acoi sese oyeroyá vahe rumo, nomochi ucai chietera oyesui” ehi. <sup>12</sup> Sese oyoya tupri judío ndahei vahe judío recocuer rese. Esepia, ñepeíño ité niha Yar opacatu ava upe nomopanei vahe oporovasasa tuvichá vahe oyeupe oporandusar upe. <sup>13</sup> Esepia, icuachiapri aracahendar pipe aipo ehi: “Acoi opacatu osenoi vahe yande Yar rer, ipĩsiropri yuvirecoira” ehi. <sup>14</sup> Ava rumo ndoporandui chira pĩsirosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduisse yuvireco. Iyavei ndosendui chira ndipoise ñehesa mombehugar yuvireco chupe. <sup>15</sup> Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri aracahendar pipe:

“¡Aviye ai eté acoi ava güeru vahe ñehesa aviye vahe p̃sirosa resendar!” ehi.

<sup>16</sup> Ndahei rumo opacatu che mu judío viroya co ñehesa p̃sirosa resendar yuvireco. Isaías niha aipo ehi avei aracahe: “Che Yar, ¿uma p̃ha viroya ore ñehe yuvireco?” ehi. <sup>17</sup> Sese yayeroya Jesucristo rese co ñehesa p̃sirosa rendusa pipe.

<sup>18</sup> ¿Osendu p̃ha judío co ñehesa yuvireco? ¿Osendu ité! Esepia, aipo ehi avei acoi icuachiapri arachendar pipe: “Sendusa niha opacatú ivi rupi iñehe” ehi.

<sup>19</sup> Iyavei, ¿osenducua p̃ha yuvireco? ¿Osenducuaño ité! Esepia, yip̃ndar Moisés omombehu icuachiapri pipe aipo ehi:

“Perecatêhira che porovasasa rese oipisise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe” ehi.

<sup>20</sup> Ipare omombehu tupri ité Isaías osiquiyeeñisave Tūpa ñehe aipo ehi vahe:

“Acoi ava ndache recai vahe, ahe che p̃isi ité yuvireco. Iyavei ayemboyecua acoi ava che rese ndoporandui vahe upe” ehi.

<sup>21</sup> Judío recocuer rese avei rumo aipo ehi: “Ari rupi añehe t̃i ava che reroyasar̃hi ndiporeroyai vahe upe vichico” ehi aracahe.

## 11

*Moviro* t̃i ava Israel pendar Tūpa oiporavo oyeupe nara

<sup>1</sup> Evocoiyase, ¿omombo p̃ha Tūpa ava Israel güembiporavo eta oyesui? ¡Aní eté! Esepia, che avei niha ichuindar aico. Abraham niha che ramoí eté, Benjamín suindar avei aico. <sup>2</sup> Yip̃isuive ité niha Tūpa, “Co ava cheundar ité” ehi ore ramoí israelita upe. Sese cūritei ndore momboi

eté oyesui. Peicua niha acoi Elías resendar icuachiapri aracahendar oyeroqui tēise omu israelita rese aipo ehise Tūpa upe: <sup>3</sup> “Che Yar, nde ñehe mombehusareta opa oyuca yuvireco. Ndeu porerecosa reropovēhesa renda avei opa omombo yuvireco. Che güeraño aicove vitemi nde reroyasar. Che yuca potaño avei eté rumo yuvireco” ehi. <sup>4</sup> Tūpa rumo omboyevi chupe: “Aipeha rumo siete mil tupri ava che mboyeroyasar cheyeupe nara noñenopiñhai vahe Baal rahanga rovai yuvireco” ehi. <sup>5</sup> Ēgüe ehi avei cūrítei opita viteño moviro judío, ahe niha Tūpa oiporavo oporoaisusa pipe. <sup>6</sup> Ipipe ité niha ěgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pipe viña.

<sup>7</sup> Evocoyase judío eta ndosecai eté mbahe oipotá catu vahe Tūpa suindar yuvireco. Sembiporavo ete ité rumo oipisi yuvireco. Ambuae upe rumo Tūpa omboavai catu viroya āgua. <sup>8</sup> Icuachiapri pipe aipo ehi aracahe: “Tūpa nomboyecua uca iri mbahe secocuer pipe. Cūrítei ěgüe ehiño vite ité yuvireco. Omondo tēi sesarā; ipipe rumo ndosepia ucai mbahe chupe. Omondo tēi avei yapisaguā; ipipe ndosenducua ucai mbahe chupe” ehi. <sup>9</sup> Iyavei David aipo ehi aracahe:

“Ipietasa ivonde nungar iyavei pira mbohasa nungar tasecoi chupe.

Ipipe sui toyuviroha mbahe tēi pipe yuvireco, toyemombaraisu uca avei ipipe yuvireco.

<sup>10</sup> Toicua eme mbahe inungar ndasesapisoi vahe yuvireco. Icuhapapri nungar ayase toyuvirecoi apirēhi vaheerā” ehi.

*Ndahei vahe judío ñepisiro agüer*

<sup>11</sup> Evocoyase areco iri che porandusa pēu: ¿Apirēhi vaheerā ité pñha judío eta ndoyeroyai Jesucristo rese oñepisiro āgua yuvireco? ¡Aní eté! Ahe rumo ěgüe ehi

ava ndahei vahe judío pĩsirosa pisi ãgua yuvireco. Ipipe sui oyemonguerẽhi catura judío ipisi ãgua yuvireco curi. <sup>12</sup> Evocoyase judío eta rembiavi sui tuvichá Tũpa poroparaisuerecosa oime opacatu ava ndahei vahe judío upe. Coiye rumo tuvicha catu itera Tũpa poroparaisuerecosa opacatu ava upe oyevise yuvireco chupe.

<sup>13</sup> Che rumo areco che ñehesa pẽu pe ndahei vahe judío. Tũpa niha che cuai oñehe mombehu ãgua ndahei vahe judío upe. Sese, “Aviye ai eté che poraviquisa” ahe che mu judío rovaque yepi. <sup>14</sup> Sendusa sui aviyeteramo oimera ipãhuve oyemonguerẽhi vahe pĩsirosa Tũpa suindar pisi ãgua oyeupe nara yuvireco. <sup>15</sup> Esepia, judío mombosa pipe sui Tũpa omoime ñerosa opacatu ava co ivi pipendar upe. ¿Mara ehira pĩha evocoyase Tũpa ipisise? Ahese oipisira tecovesa apirẽhi vahe yuvireco, evocoyase ndoyuvireco iri chira omano vahe nungar Tũpa upe. <sup>16</sup> Esepia, yipindar panguã sui yapopri seropovẽhese Tũpa upe, opacatu panvi evocoyase sovasapri avei ichui. Iyavei inungar ivira rapo seropovẽhese Tũpa upe viña, sãca avei evocoyase opacatu egũe ehi aveira viña.

<sup>17</sup> Amove che mu judío inungar Olivo rãca yasiapri. Pe evocoyase ndahei vahe judío ivira caha pipendar rãca nungar peico vahe, peso yasiapri rendagüerve, ipipe sui peipisi vĩracuasa pe recove ãgua. <sup>18</sup> Aní chira rumo, “Yande aviye catu vahe yaico ivira rãca nungar yipindar yuvirecoi vahe sui” peye pe yeecomboivate aisa pipe. Esepia, ndahei pe sui judío oipisi oyemoviracua ãgua yuvireco, pe rumo yipindar ichui eté peipisi pe yemoviracua ãgua.

<sup>19</sup> Iyavei, “Co judío rumo imombosa ité ivira rãca asiapri nungar yande sendagüerve yapita vaherã” peye revo.

<sup>20</sup> Supi eté, co rumo Tũpa reroyaẽhi pipe ahe imombosa

ichui yuvireco, pe rumo seroya pīpe suiño ité pepita sendagüerve. Sese peicua catu, aní chira peyemboivate ai ipīpe. <sup>21</sup> Esepia, Tūpa oiporavo co judío oyeupe nara ité viña, ndoviroyaise rumo, ndoipisii eté. Pēu avei ěgüe ehira ndapemboyeroyaise. <sup>22</sup> Peyapisaca tupri, Tūpa niha aviye vahe ité. Seco pīrata vahe avei rumo ava viroyaēhisar upe. Pēu rumo aviye ité. Peicoño catu iporoaisusa pīpe; aviyeteramo ndapeicoise supi, pe avei yasiapri nungar tēi peicora. <sup>23</sup> Opoipase rumo judío eta Cristo reroyaēhisa sui, Tūpa evocoyase viroyevi irira oyeupe nara. Esepia, chupe iya ité ipisi iri āgua. <sup>24</sup> Pe ndahei vahe judío ivira caha pīpendar rāca yasiapri nungar peico, Tūpa rumo pe mondo ivira aviye vahe nungar rese. ¡Evocoyase judío ete ité inungar ahe ivira aviye vahe rāca yasiapri, ahe ivate catu oipisi irira oyeupe nara!

*Ipa vahe judío ñepisiro agüer*

<sup>25</sup> Che rivireta, che aipota, “Toicua Tūpa remimbotar icuapirēhi oyemboivate aiēhi āgua yuvireco” ahe pēu. Esepia, amove Tūpa judío upe omboavai viroya āgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pēu, <sup>26</sup> ahese ramo opacatu ava judío yuvirecoi vahe Tūpa oipīsirora. Esepia, icuachiapri aracahendar pīpe aipo ehi:

“Oura ava Pīsīrosar judío recua Sión pāhu sui, ahe oipehara mbahe naporai vahe opacatu judío sui.

<sup>27</sup> Evocoi niha che remimbotar chupe nara, amocañise yangaipagüer yuvireco ichui” ehi.

<sup>28</sup> ěgüe ehi cūrītei judío eta ndosendu potai ñehesa pīsīrosa resendar yuvireco. Sese Tūpa amotarēhisar yuvirecoi. Pēu mbahe tupri āgua rumo ěgüe ehi. Tūpa rumo osaisu vite. Esepia, yipive ité oiporavo tamoi eta oyeupe. <sup>29</sup> Supi eté, Tūpa ndoviroyevi iri

eté mbahe güemimondo iyavei ndovirova-rova tēi vahe opīhañemoñetasa güembiporavo sui. <sup>30</sup> Yipīndar niha pe ndapemboyeroyai eté Tūpa. Cūritei rumo judío eta ndoviroyaise yuvireco, pe paraisuereco Tūpa. <sup>31</sup> Ēgüe ehi avei judío eta cūritei ndoviroyai yuvireco. Tūpa pe paraisuereco uca āgua rumo ēgüe ehi yuvireco. Coiye inungar pe, judío avei osupitira Tūpa poroparaisuerecosa yuvireco. <sup>32</sup> Esepia, Tūpa ité, “Opacatú oyavi mbahe che reroyaēhisa pīpe” ehi ‘oicuae mbahe güembiavi, tiquerēhi opacatú che poroparaisuerecosa pīsi āgua yuvireco’ oya.

<sup>33</sup> ¿Mara ehi rutei Tūpa aracuasa, imbahecuasa avei? Ndipoi chietera que ava yaracuasa mombehu tupri āgua. Ndayaicatui avei secocuer cuapa tupri āgua. <sup>34</sup> Ndipoi eté que ava oicua vahe yande Yar pīhañemoñetasa iyavei ndipoi eté que ambuae ava tēi ombohe vahe no. <sup>35</sup> Ndipoi que ava mbahe omondo vahe yande Yar upe ‘tomboyevi cheu’ ohesave. <sup>36</sup> Esepia, Tūpa suiño ité niha opacatu mbahe oime, oyeupe nara avei mbahe oyapo opīratasa pīpe. ¡Sese imboeteipri ité Tūpa tasecoi yepi! Ēgüe tehi apirēhi.

## 12

*Yande recocuer imondopri* Tūpa upe nara

<sup>1</sup> Sese che rivireta, che Tūpa poroparaisuerecosa pīpe aipota pe yemondo ité pe recoveseve chupe nara, inungar mbahe Tūpa upe seropovēhepri ité, ahe aviye itera chupe. Ahe niha pe cuaita pe pīha pīpe sui eté peyapo vaherā chupe. <sup>2</sup> Peico iri eme co ivi pīpendar pīhañemoñetasa tēi rupi. Iyacatu rumo pesecuñaro pe pīhañemoñetasa. Ipīpe sui opacatu pe recocuer oñecuñarora. Ēgüe peyese, peicuara Tūpa remimbotar ahe mbahe aviye vahe, semimbotar supi tupri vahe ité.



<sup>3</sup> Tūpa niha oporovasasa pīpe che cuai, sese aipo ahe pēu: pepīhañemoñeta eme pe yemboivate ai āgua rese. Iyacatu rumo peicua tupri pe pīhañemoñetasa peyesendar Tūpa pēu mbahe imbougüer rupi sese pe yeroyasa pīpe. <sup>4</sup> Inungar yande rete ñepeño ité, sesendar rumo setá, iyavei ndahoyoyai mbahe sembiapo. <sup>5</sup> Ëgüe yahe avei yande, yepe que yande retara viña, Cristo rese yayemboyase rumo, ñepe vahe nungar yaico. Evocoyase yande ñepe-pe opacatu upendar yaico.

<sup>6</sup> Tūpa niha omboyeavirati mbahecuasa imbou oporoaisusa pīpe ñepe-pe upe. Evocoyase Tūpa ombouse oñehe mombehu āgua yandeu, yamombehura ñepe-pe iñehe sese yande yeroyagüer rupi. <sup>7</sup> Que ombouse mbahecuasa ambuae ava pītívii āgua yandeu, yaipītívii tupri aveira. Ombouse yande porombohe āgua, yaporombohe tupriño itera. <sup>8</sup> Iyavei ombouse yandeu ambuae ava monguerēhi āgua, yaporomonguerēhiño itera. Ombouse yande poropītívii āgua ava mbahe ndovirecoi vahe upe, yamondoño itera mbahe chupe yande recatēhiēhisave. Acoi oporocuai vahe, toyapoño oquerēhisa pīpe; iparaisu vahe pītiviisar, toipītiviño avei vorivetesasa pīpe.

### *Cristo reroyasar cuaita*

<sup>9</sup> Iyavei peyeaisu tupri ité; aní pesepia potara mbahe tēi, iyacatu rumo peicoño itera mbahe aviye vahe pīpe. <sup>10</sup> Peyeaisu catu ñepe-pe oyeivri nungar tupri pe recosa pīpe. Pe ae peyemboetei rāgüer sui pemboetei catura ambuae ava Jesús reroyasar.

<sup>11</sup> Peyemonguerēhi, aní ndapequerēhii chira iyavei peyapo yande Yar upe mbahe opacatu pe recoete pīpe.

<sup>12</sup> Peicoño pe viharetesave mbahe iva péndar rãrosa pipe; peñemosãño mbahe rasicuer peiporarase iyavei aní chira peseya pe yeruresa yepi.

<sup>13</sup> Peipítivií ambuae ava Cristo reroyasar mbahe ipanese chupe, pemohapisira ava oyepota vahe pe piri.

<sup>14</sup> Peyerure pe amotarẽhimbar rese; peporandu Tũpa porovasasa rese ahe ava upe nara; aní pe avei peñehe mara chupe.

<sup>15</sup> Peyembovĩha acoi ava oyembovĩha vahe rupive; peyaseho avei ava oyaseho vahe rupive.

<sup>16</sup> Peico tuprĩ oyoya guasu ñepei-peí oyese pe yeaisusa pipe. Aní chira peyecomboivate ai. Iyacatu rumo peyemoingatu ava seco mbegüemi vahe mbori ãgua. Aní peñemoha imbahecua vai vahe nungar.

<sup>17</sup> Aní pẽu mbahe tẽi aposar upe pemboyevira mbahe tẽi avei. Peyapo catu mbahe tuprĩ opacatu ava rembiepiave. <sup>18</sup> Peicatu vahe rupi peseca pe reco tuprĩ ãgua opacatu ava upe. <sup>19</sup> Che rivireta, aní pe ae pemboyevi mbahe tẽi pipe pe rereco momarasar upe. Peseyaño Tũpa upe. Ahe oicuaru chupe. Esepia, icuachiapri pipe aipo ehi: “Che ité aicuara ava mbahe tẽi aposar upe. Che amboepira” ehi yande Yar. <sup>20</sup> Iyavei aipo ehi: “Acoi nde amotarẽhimbar ndasiepoise, emondo mbahe itohu, iyavei acoi ihuseise, eremondora itoihu. Esepia, ãgüe peyese pe amotarẽhimbar upe, ochĩra pe sui” ehi. <sup>21</sup> Aní mbahe tẽi upe peyecopi uca. Iyacatu rumo pesecopira mbahe-mbahe tẽi mbahe tuprĩ aposa pipe.

## 13

<sup>1</sup> Opacatu mborerecuar yuvirecoi vahe pemboyeroyara. Esepia, ndipoi mborerecuar ndovirecoi vahe ocuaita Tũpa suindar. Co oime vahe rumo semimbou ité.

<sup>2</sup> Sese acoi mborerecuar upe que mara ehi vahe, Tũpa

porocuaita reroyaēhisar yuvirecoi. Ēgüe ehi vahe inu-pambri yuvirecoira. <sup>3</sup> Esepia, mborerecuar yuvirecoi vahe ndahei ava seco tupri vahe mbosiquiye āgua yuvirecoi, ahe rumo yuvirecoi ava mbahe tēi aposar mbosiquiye āgua. Ndayasiquiye potaise mborerecuar sui, iya yaicora mbahe tupri pipe. Mborerecuar evocoyase, “Aviye” ehira yande reco catuprisa rese yandeu. <sup>4</sup> Esepia, ahe Tūpa rembiguai mbahe tupri apo āgua yandeu. Acoi mbahe tēi yayapose rumo, yasiquiyera ichui. Esepia, ahese mborerecuar yande nupaño itera yuvireco. Ahe niha Tūpa remimbotar rupi eté icuaita ava mbahe tēi aposar nupa āgua yuvireco. <sup>5</sup> Sese iya yamboyeroya ité mborerecuar; ndahei rumo ahe yande nupaēhi āgua reseño, yande pīhañemoñetasa momaraēhi āgua rese avei. <sup>6</sup> Sese avei yamondora guarepochi mborerecuar upe yuvireco yandeu oporanduse. Esepia, ahe mborerecuar Tūpa rembiguai yuvirecoi. Evocoyase aheño ité iporaviqusa yuvireco.

<sup>7</sup> Yamondo ñepeipei-pei ava upe mbahe chupendar. Iya ité yamondo mborerecuar upe guarepochi oporanduse sese, yamboetei avei ava imboyeroyapri.

<sup>8</sup> Aní yandereve. Ahe yande cuaita. Yande cuaita avei yande yeaisu āgua, supi eté acoi ava osaisu vahe ambuae ava, omboaviye ité Tūpa porocuaita. <sup>9</sup> Aipo ehi acoi Tūpa porocuaita: “Ndapeyemboaguasai chira, ndapeporoyucaí chira, ndapemondai chira, ndaperemirai chira, ndapeipota rai chiaveira ambuae ava mbahe” ehi. Co iyavei opacatu ambuae Tūpa porocuaita sendusa tupri ité co ambuae ñehesa rese: “Pesaisu ava pe yeaisu nungar” ehi. <sup>10</sup> Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboaviyesa tupri ité porocuaita.

<sup>11</sup> Iyavei peicua tupri co mbahe oime vahe yandeu.

Cūrítei ari osupiti ité yandeu yande yemopoase água. Esepia, yande Yar yevi água cōimi catu yandeu iñehengagüer yipindar seroyasa sui. <sup>12</sup> Supi eté osupiti senimi ari yandeu; sese iyacatu yapoi pĩtumimbi vahe nungar mbahe-mbahe tēi aposa sui mbahe icatupri vahe pipe yande reco água. Evocoyase tayaico sundao oyoepisa omonde vahe nungar. <sup>13</sup> Yande catu yaguata yande reco ñvi tuprisa pipe, inungar yaguatase ari pipe. Aní catu yaico caguar pipe tēi iyavei pieta siapu tēi vahe rupi, ndayande poropota rai chiaveira, iyavei ndayayapoi chira mbahe tēi, ndayaicoi chiaveira yande pihañemoñeta ndahoyoyai vahe pipe, ambuae ava mbahe pota raisa pipe avei no. <sup>14</sup> Iya rumo yarecora yande Yar Jesucristo recocuer yande yese, aní yande pihañemoñeta mbahe-mbahe tēi apo água yande remimbotarai pipe.

## 14

*Aní pero*ñiro ambuae Jesús reroyasar

<sup>1</sup> Acoi ava ndoyeroya tupri vitei vahe yande Yar rese que oiquese pe piri, peipisi tuprira; aní peiñehepoepira ipihañemoñetasa ndahoyoyaise pe pihañemoñeta rese. <sup>2</sup> Esepia, amove evocoi nungar ava ihupri pãve tēi yuvirohu, oime rumo amove ava ipihañemoñeta opacatu mbahe hu água rese. <sup>3</sup> Acoi ava opacatu mbahe ohu vahe, toviroñiro eme amove ndohui vahe mbahe iyavei acoi amove ndohui vahe mbahe, toviroñiro eme acoi ohu vahe opacatu mbahe. Esepia, evocoi nungar ava Tüpa oipisi ité. <sup>4</sup> Supi eté pe ndiyai eté peroñiro vaherã ambuae ava rembiguai. Esepia, ahe yande Yar povri pendar secoi. Yepe ndoyaviise mbahe ipipe, anise ichui oviapise mbahe tēi pipe, sereciar ité oicuaru chupe. Esepia, yande Yar opiratasa pipe osecomoingatuño itera.

<sup>5</sup> Oime avei amove ava ñepeí ari omboetei catu yuvireco ambuae ari sui, iyavei ambuae oime aipo ehi: “Oyoya guasuño ité niha ari” ehi vahe. Ñepeí-pei opíhañemoñeta rupi, “Co supi tupri vahe” ehira opíha pípe yuvireco.

<sup>6</sup> Acoi que ñepeí ari ava omboetei vahe, yande Yar mboeteisa pípe rumo ãgüe ehi. Iyavei ohu vahe opacatu mbahe, Yar mboeteisave avei ãgüe ehi. Esepia, ahe güembiapo rese, “Avíye ndeu” ehi Tüpa upe; iyavei acoi amove ndohui vahe mbahe, Yar mboeteisave ãgüe ehi, iyavei, “Avíye ndeu” ehi avei Tüpa upe.

<sup>7</sup> Esepia, yande ñepeí-pei ndayaicoi yandeyeupe nara tēi, ndayamanoi avei yandeyeupe nara. <sup>8</sup> Esepia, yaicove vitesé, yaico yande Yar upe nara; yamanosé, yamano yande Yar upe nara avei. ãgüe yahe yande yaicove vitesé, anise yamanosé, opacatu chupe nara ité yaico. <sup>9</sup> Sese niha Cristo omano, ipare ocuerayeví opacatu ava Yar güeco ãgua que omano vahe, anise que oicove vite vahe upe avei.

<sup>10</sup> ¿Mahera evocoyase peroñro pe mboetasa Cristo reroyasar iyavei mahera ndapesepia potai? Esepia, supi eté niha yande opacatú yasora Tüpa rovai. Ahe evocoyase opara oporandu yande recocuer rese yandeu. <sup>11</sup> Esepia, icuachiapri aracahendar pípe omombehu:

“Supi eté che reco pípe aipo ahe, ehi yande Yar, opacatu  
ava oñenopíhara che rovai yuvireco, iyavei che  
mboeteira yuvireco,  
ehi” ehi.

<sup>12</sup> Evocoyase yande ñepeí-pei yamombehura yande recocuer Tüpa upe.

*Aní pe* rivireta mbahe tēi pípe pereco uca

<sup>13</sup> Sese yande ndiyai yañeroiro. Iyacatu rumo ñepeí reseve pereco tupri ambuae pe rivri, angaipa pípe sereco ucaēhi ãgua, iyeroyasa momaraēhi ãgua avei. <sup>14</sup> Che yande Yar reroyasar che reco pípe aicua ndipoi eté que

tembihu yande reco momara vahe. Amove rumo ava, “Mbahe tēi co tembihu, ndiyai yahu” ehise, ahe chupe evocoyase mbahe tēi, ndiyai eté ihu āgua. <sup>15</sup> Iyavei yande que mbahe yahuse, ipipe yamomara tēise yande rivri pihañemoñetasa Tūpa rese, ndahei evocoyase yande poroaisusa pipe ité ěgüe yahe. ¡Aní ahe yamocañi tēi uca Cristo sui evocoi nungar mbahe yahu vahesa pipe! Esepia, secocuer rese Cristo omano. <sup>16</sup> Yepe que mbahe aviyera yandeu viña, ndayayapoi chira rumo evocoi nungar yande rembiapo rese ava ñehe-ñehe tēiēhi āgua. <sup>17</sup> Esepia, ndahei ivate catu vahe Tūpa upe yande carusa, yande igua avei ipovrive yande recose. Ěgüe ehi rumo co ivate catu vahe chupe yande recocuer mohivisa, yande reco tuprisa ambuae Tūpa reroyasar pāhuve iyavei yande rorivetesa yareco vahe Espíritu Santo sui. <sup>18</sup> Ěgüe yahese Cristo mboeteisave, aviye aira Tūpa upe iyavei opacatu ava rembiepiave avei no.

<sup>19</sup> Sese opacatu yande recoeté pipe yasecara yaico tupri vaheṛā yandeyeupe. Ipipe sui yande yaicatura yañepitivii yande yemoviracua tupri āgua yande Yar rese. <sup>20</sup> Aní pemocañi uca tēi ava recocuer Tūpa remipĩsiro tembihu sui tēi. Opacatu niha co tembihu aviye aiño ité; ndiyai eté rumo yahu que tembihu ambuae ava Cristo reroyasar pihañemoñetasa momara āgua. <sup>21</sup> Aviye catu ndayahuse mbahe roho, que ndayahuse uva ricuer iyavei que ambuae mbahe ndayayapoise, ambuae ava Cristo reroyasar angaipa pipe seití uca iriēhi āgua. <sup>22</sup> Yande pihañemoñetasa yareco vahe rumo yarecoño itera yandeyeupe ité Tūpa rovaque. ¡Aviye ai catuño ité ava acoi, “Aviye yayapose evocoi nungar mbahe” he pare, “¿Mara ehi pīha?” ndehi irise opihañemoñetasa pipe! <sup>23</sup> Acoi que ava, “¿Mara ehi pīha?” ehise tembihu

upe. Ipare rumo ohuse, ahe evocoyase oyemboangaipa ipipe. Esepia, ndohui Tūpa rese oyeroyasa pipe. Iyavei ava, “¿Mara ehi pīha?” ehi vitesese que mbahe upe, ipare oyapose ité, ahe angaipa.

## 15

*Yambovihara* ava yande cotindar, ndahei chira yande ae tēi yayembovichara

<sup>1</sup> Yande yayemoviracua catu vahe Cristo rese yande yeroyasa pipe, iyacatu yande teieté yañemosañora ava Tūpa rese ndipihañemoñeta tupri vitei vahe rese. Ndahei chira rumo yande ae tēi yayemboviha. <sup>2</sup> Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye āgua yuvireco chupe ‘toyeroya catu opihañemoñeta pipe Tūpa rese yuvireco’ yande yapave. <sup>3</sup> Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri ité acoi omombehu vahe: “Nde rese ñehe-ñehe tēi opa aipisi” ehi. <sup>4</sup> Supi eté co opacatu omombehu vahe aracahe opa icuachiasa yande mbohe āgua, yande yasāro vaherā Tūpa reco porañetesa yande ñemosasa pipe iyavei yande pihamonguerēhisa pipe avei ahe yareco vahe ichuindar. <sup>5</sup> Tūpa, acoi ombou vahe yande ñemosasa, yande pihamonguerēhisa avei yandeu, tape pītivii oyoya guasu pe reco tupri āgua ñepei-peí peyese Jesucristo recocuer rupi. <sup>6</sup> Ipipe sui pe opacatu oyoya guasu ñepei pe pihanemoñetasa pipe, pe ñehe pipe avei tapemboetei Tūpa, yande Yar Jesucristo Ru.

*Ñehesa* pīsirosa resendar imombehusa ava eta ndahei vahe judío upe

<sup>7</sup> Peyepisi tupri ñepei-peí, inungar Cristo pe pisi tupri oyeupe nara Vu mboetei āgua. <sup>8</sup> Che rumo aipo

ahe pëu: Jesucristo ou judío p̃tívii Tūpa remimombe-hugüer mboaviye āgua judío ramoi aracadendar upe. Ēgüe ehi Tūpa oñehe mboaviyesa mboyecua <sup>9</sup> ‘tomboetei ava ndahei vahe judío yuvirecoi vahe che Ru Tūpa iporoparaisuerecosa rese yuvireco’ oyapave. Ahe ēgüe ehi icuachiapri rupi tupri ité aipo ehi vahe:

“Sese che oromboeteira opacatu ava ndahei vahe judío pāhu rupi, iyavei asapucaira ndeu nde rer mboeteisa pipe” ehi.

<sup>10</sup> Iyavei acoi ambuae icuachiapri pipe omombehu avei no: “¡Peyemboviha catu pe opacatu ndahei vahe judío peico vahe judío Tūpa rembiporavo reseve!” ehi.

<sup>11</sup> Ambuae pipe avei aipo ehi no:

“Pe opacatu ivi pipendar ava, ¡pembroetei yande Yar!” ehi.

<sup>12</sup> Isaías avei aipo ehi icuachía:

“Oimera niha ava Isaí suindar, opacatu ava rerecuarã secoira.

Ava ndahei vahe judío seseño ité oyeroyara yuvireco” ehi.

<sup>13</sup> Tūpa acoi ombou vahe mbahe oyesuindar rãro āgua, tayandé mboviharete catu iyavei mbahe tupri tayareco sese yeroyasa pipe. Ipipe sui tombou yasãro vahrã ahe mbahe aviye vahe Espiritu Santo p̃iratasa pipe.

<sup>14</sup> Che rivireta, ayeroya ité pe reco aviyesa rese, opacatu mbahe peicuapa tupri, peicatu avei pe ñepeí-peí peyeupe pe yemboaracua āgua. <sup>15</sup> Co tecocuer rese rumo aicuachía opacatu che siquiyeēhisa pipe pëu pe resaraiēhi āgua ichui. Esepia, ayapo Tūpa che cuaita ombou vahe che raisusa pipe cheu <sup>16</sup> Jesucristo rese che poraviqui āgua ava ndahei vahe judío recocuer aviye āgua. Evocoyase judío pahí nungar che cuaisa pipe amombehu co ñehesa Tūpa ombou vahe p̃sirosa resendar yuvireco chupe imoporēhi āgua Tūpa rovai inungar mbahe seropovēhepri aviye vahe Tūpa upe Espiritu Santo pipe yepi.



<sup>17</sup> Supi eté che Jesucristo reroyasar che recosa pipe aviharete Tūpa che cuaita rese. <sup>18</sup> Esepia, cheu ndiyai añehe vaheṛā que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu añehe vaheṛā. Esepia, amonguerēhi Tūpa reroya āgua yuvireco che ñehe rese, che rembiapo sui avei. <sup>19</sup> Ēgüe ahe poromondiisa mbahe yavai vahe apo Tūpa pīratasa pipe. Ahe ayapo Espiritu Tūpa suindar pīratasa pipe. Ipipe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no. <sup>20</sup> Chequerēhi avei co ñehesa p̄sirosa resendar mombehu āgua ava Cristo recocuer ndosendui vahe upe yepi. Ndahei rumo ambuae ava imboaracua pare tēi, <sup>21</sup> che rumo ayapo inungar icuachiapri pipe omombehu vahe: “Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

*Pablo* ip̄ihañemoñeta Roma ve oso āgua

<sup>22</sup> Co rese tēi che ndaicutui aso pe p̄iri, yepe setá rupi aso pota tēi viña. <sup>23</sup> Cūritei rumo opa amboaviye che poraviqui co ivi rupi, iyavei opa tēi setá araviter pe p̄iri che sosa rāgüer. <sup>24</sup> España ve che soseve, ap̄ita pucumira vicho pe p̄iri yande yemboviha āgua. Iyavei pe sui che sē potase, che p̄t̄ivimira peye aheve che so āgua. <sup>25</sup> Cūritei rumo che asora Jerusalén ve. Arasora porerecosa ahe pendar yande mboetasa Jesús reroyasar p̄t̄ivii āgua. <sup>26</sup> Esepia, ivi Macedonia pendar iyavei Acaya pendar Jesús reroyasar, ahe omonuha guarepochi yuvireco Jerusalén ve yande rivri iparaisu vahe p̄t̄ivii āgua yuvireco. <sup>27</sup> Ahe ēgüe ehi güemimbotar rupi yuvireco iyavei iya ité imboyevi āgua yuvireco chupe ahe mbahe tupri oyeupe apo agüer

rese. Esepia, yipindar Jesús reroyasar judío yuvirecoi vahe oicua uca co tecocuer Tūpa suindar ahe ava ndahei vahe judío yuvirecoi vahe upe. Sese iya ité imboyevi āgua co ivi pipendar porerecosa chupe. <sup>28</sup> Opase che co porerecosa amondo yuvireco chupe, España ve che sose, ahese apitara vicho pe piri. <sup>29</sup> Che amoha voi eté asose eipeve, tuvichá omboura Cristo oporovasasa yandeu.

<sup>30</sup> Che rivireta, yande Yar Jesucristo rer pipe iyavei yeaisusa Espiritu ombou vahe pipe avei aporandu pēu opacatu che rese peyeroqui pīrata vaheřā Tūpa upe che pītivii āgua co mboraviqui rese. <sup>31</sup> Peporandu Tūpa upe, tache repi ava Jesús reroyasarēhi sui ivi Judea ve, iyavei Jerusalén pendar yande rivireta co porerecosa pisi tupri āgua avei. <sup>32</sup> Ahese Tūpa oipotase, che aviharetera ayepotase pe repia, iyavei toime pītuhusa yandeu che pe piri che sose. <sup>33</sup> Ēgüe tehi Tūpa güeco tupriřa pipe tasecoi opacatu pe rese.

## 16

### *Pablo mahenduhasa ñepei-pei ava upe*

<sup>1</sup> Co yande reindri Febe serer vahe, ahe oipītivii tecua Cencrea pendar Cristo reroyasar oico. <sup>2</sup> Peipisi tupri catu yande Yar rer pipe; ahe niha yande cuaita Cristo reroyasar yande recose, iyavei peipītiviĩño que mbahe chupe ipane vahe rese. Esepia, ahe setá ité oporopītivii iyavei che avei eté che pītivii no.

<sup>3</sup> Pemombehu che mahenduha Prisca upe, Aquila upe avei, ahe niha che pītivii mboraviqui Jesucristo recocuer resendar rese yuvireco. <sup>4</sup> Ahe avei niha mbahe tēi pipe omondo güecocuer che repicave yuvireco, sese, “Aviye” ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvireco

chupe. <sup>5</sup> Pemombehu avei che mahenduha sētave oñemonuha vahe upe yuvireco. Pemombehu avei che mahenduha che rembiaisu Epeneto upe. Ahe rane niha yipindar ivi Asia pendar Cristo reroyasar. <sup>6</sup> Pemombehu avei che mahenduha María upe. Ahe niha oporaviquí iteanga vahe pe recocuer rese. <sup>7</sup> Pemombehu avei che mahenduha che mu Andrónico iyavei Junias upe. Ahe niha che mboetasa yuvirecoi che roquendasave; ahe avei apóstol remimboyeroa yuvirecoi, ahe rane avei yipindar Cristo reroyasar yuvirecoi che sui.

<sup>8</sup> Pemombehu avei che mahenduha che rembiaisu Ampliato upe yande Yar rese secosa pipe. <sup>9</sup> Pemombehu avei che mahenduha Urbano upe. Ahe niha yande ndugüer oporaviqui vahe Cristo recocuer rese, che mboripar Estaquis upe avei. <sup>10</sup> Pemombehu avei che mahenduha Apeles upe. Ahe niha güecoãhasa sui osē tupri vahe Cristo rese oyeroyasa pipe. Iyavei pemombehu che mahenduhasa ava Aristóbulo rēta pipendar yuvirecoi vahe upe avei. <sup>11</sup> Pemombehu avei che mahenduha che mu Herodión upe, ava Narciso rēta pipendar yande Yar reroyasar upe avei. <sup>12</sup> Pemombehu avei che mahenduha Trifena upe iyavei Trifosa upe. Ahe niha oporaviqui vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporaviqui ité yande Yar upe nara. <sup>13</sup> Pemombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi. <sup>14</sup> Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei. <sup>15</sup> Pemombehu avei che mahenduha Filólogo upe iyavei Julia upe, Nereo upe iyavei seindri upe, Olimpás upe, opacatu yande rivri yande Yar rese yuvirecoi vahe ipirindar upe avei.

<sup>16</sup> Peyeovaupite catu pe reco maranehisa pipe che mahenduha mombehuse peyeupe. Opacatu Cristo reroyasar cohawe omondo avei omahenduhasa yuvireco pëu.

<sup>17</sup> Che rivireta, peicua catu pe pãhu pendar omboyaho pota serai vahe sui. Oime ava êgüe ehi vahe, oiti uca vahe ava mbahe tõi pipe. Esepia, ahe ndahei eté co ñehesa pe yembohesa rupi yuvirecoi. Sese evocoi nungar ava sui peyepipiño itera. <sup>18</sup> Esepia, ahe ava ndahei yande Yar Jesucristo upe nara oyapo mbahe yuvireco. Êgüe ehi rumo ahe oyeupe nara tõi oipota rai mbahe yuvireco. Iyavei ombopa ava ndayaracua tuprii vahe; oñehe tupri ai angahu oporomohapisi aisa pipe tõi yuvireco. <sup>19</sup> Opacatu ité icuasa pe poreroyasa. Sese che aviharete vichico. Che rumo aipota pemboyecua vaherã pe mbahecuasa mbahe aviye vahe apo ãgua, ndahei mbahe tõi apo ãgua. <sup>20</sup> Evocoyase Tũpa güeco tupriisa pipe pihaivi Carugar osecopipa tupri itera. Pe avei evocoyase pesecoroyira. Yande Yar Jesucristo tape rovasa.

<sup>21</sup> Omondo avei omahenduhasa Timoteo pëu. Ahe che pĩtivii che poraviquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

<sup>22</sup> Che, Tercio, aicuachía vahe co ñehesa pëu, che avei che mahenduhasa amondo yande Yar reroyasa pipe pëu.

<sup>23</sup> Omondo avei omahenduhasa Gayo pëu. Ahe sètave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu pëu, ahe tecua mbahe guarepochi apocatusar. Yande rivri Cuarto avei omondo omahenduhasa pëu.

<sup>24</sup> Aviye, yande Yar Jesucristo tape rovasa opacatu.

*Pablo omboetei Tũpa*

<sup>25</sup> ¡Yamboetei Tūpa! Ahe niha oicatu pe moviracua co ñehesa ñepisirosa resendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tūpa omboyecua ramo vahe cheu co ivi apoēhi suive mbahe ndicuasai vahe rese. <sup>26</sup> Cūritei rumo oyecua uca oñehe mombehusar rembicuachía pipe Tūpa apirēhi vahe porocuita rupi cute. Ahe ñehesa ndicuasai vahe omboyecua uca opacatú ava upe ‘toviroya sese oyeroyasa pipe yuvireco’ oya.

<sup>27</sup> ¡Tūpa güeraño imbahecuá vahe yepi, ēgüe tehi ahe yande Yar Jesucristo rer pipe imboeteipri tasecoi!

## Tüpa Ñehengagüer

New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

### Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 14 Jun 2022 from source files dated 30 Nov 2021

c27c2d97-c359-59f5-b367-83efb2e33739